

## URBANUS VII

PAPA CCXXX

Anno Christi MDXC.

Vigesima post Sixti V mortem die, electus est in Summum Pontificem Ioannes Baptista cardinalis Castaneus, Ianuensis, antea presbyter tituli S. Marcelli, et archiepiscopus Rossanensis. Nihil post sui electionem fecit, morbo impeditus, quo sublatus vi kalendas octobris anno MDXC, die scilicet duodecima post quam fuerat electus. Corpus eius delatum est ad Basilicam Vaticanam. Vacavit sedes menses duos, dies decem <sup>1</sup>.

I.

*Deputatio cardinalis Pinelli in praefectum congregationis S. R. E. cardinalium, super consultationibus negotiorum temporalis ditionis Status Ecclesiastici praepositorum* <sup>2</sup>.

Dilecto filio nostro Dominico tituli sancti Laurentii in Pace et Perna presbytero card. Pinello nuncupato

Urbanus Papa VII.

Dilecte fili noster, salutem et apostolicam benedictionem.

Cum dilectus filius noster Alexander, cardinalis Montaltus nuncupatus, congregationi pro consultationibus negotiorum Status Ecclesiastici, cui sub felicis recordationis Sixto Papa V, praedecessore nostro, praeter alia sibi tunc incumbenda munera, praecerat, aliquibus iustis, ut nobis exposuit, de causis impeditus, commode vacare minime possit, nos, ne huiusmodi negotiorum expeditiones aliqua hoc tempore defrimenta sustineant, tua

<sup>1</sup> Inclusis in utroque computo extremis.

<sup>2</sup> Ex Regest. in Secret. Brevium.

opera, de cuius fide, prudentia atque solertia plurimum in Domino confidimus, in huiusmodi munere uti decrevimus. Itaque tibi, qui unus ex S. R. E. cardinalibus in dicta congregatione deputatus existis, ut una cum eisdem cardinalibus in dicta congregatione deputatis, prout hactenus fecisti, consultationes, deputationes seu quaerelas quorumcumque ditioni nostrae temporali subiectorum, ad nos confluentes, super causis tam civilibus quam criminalibus, ad forum saeculare dumtaxat spectantes, audire et statis diebus cum dictis cardinalibus conferre et de maioris partis sententia expedire: nec non super iis, quae in dicta congregatione de sententia maioris partis, ut praefertur, decreta et diffinita fuerint, litteras nostro nomine ad provinciarum legatos et vice-legatos, civitatum gubernatores et alios terrarum et oppidorum, quocumque nomine vocentur, magistratus et officiales in statu et ditione temporali nostra et Sedis Apostolicae nunc et pro tempore constitutos; nec non responsa ac mandata nostra illis et aliis etiam privatis personis, quibus opus fuerit, scribere valeas ac debeas; et quod litteris tuis eadem prorsus fides adhibeatur, quae adhiberetur si nostra manu subscriptae essent, auctoritate apostolica, plenam et liberam facultatem concedimus, ac tenore praesentium etiam iniungimus; contrariis non obstantibus quibuscumque.

Datum Romae apud S. Petrum, sub annulo Piscatoris, die xx septembris MDXC, suscepti a nobis apostolatus officii an. i.

Dat. die 20 sept. 1590, pontif. an. i.

Committitur  
cardinali Pinelli

## GREGORIUS XIV

PAPA CCXXXI

Anno Christi MDXC.

Die v decembris anno MDXC ad Summum Pontificatum evectus est Nicolaus Sfondratus, patria Mediolanensis, antea presbyter cardinalis tituli S. Ceciliae, cui sacra thiara imposita est die viii mensis eiusdem. Vixit menses decem, dies decem temporibus Rodulphi II imperatoris. Creavit cardinales quinque. Ex hac vita decessit die xv octobris, eiusque cadaver delatum est ad Basilicam Vaticanam, et reconditum in sacello, quod a Gregorio XIII, qui illud erexit, Gregorianum appellatur. Vacavit Sedes dies xiv.

I.

*Confirmatio constitutionis Pii V de non alienandis et infeudandis terris et locis S. R. E.* <sup>1</sup>.

Gregorius Episcopus, servus servorum Dei, ad perpetuam rei memoriam.

Romanus Pontifex, pro pastoralis sibi divinitus iniuncti muneris debito, inter caeteras, quas pro communi bono christianae reipublicae suscipit, curas, etiam ad ea confirmanda, quae ad Statum Ecclesiasticum et S. R. E. ditionem, etiam temporalem, in primis tuendam et con-

<sup>1</sup> Haec Pii V Constitutio est LIII: *Admonet* Nos, tom. VII, pag. 560, ubi tibi indicavi eius declarationes et extensiones. Eandem constitutionem certo modo declaravit etiam iste Gregorius in Consistorio secreto, sed eam declarationem reiecit Clemens VIII, ut infra in sua Constit. *Ad Romani*

servandam a praedecessoribus suis non minus prudenter ac sapienter, quam rite et recte gesta et constituta fuerunt incumbere solet; et quo firmitus illa subsistant et sanctius ab omnibus observentur, suae comprobationis et muniminis partes libenter ac mature adhibet, prout in Domino conspicit salubriter expedire.

§ 1. Sane iam pridem felicis recordationis Pius Papa V, praedecessor noster, tenoris subsequentis litteras edidit <sup>1</sup>.

§ 2. Non igitur recolendae memoriae Gregorii XIII ac Sixti V, Romanorum Pontificum similiter praedecessorum nostrorum, exempla ac pium in tuendis S. R. E. iuribus zelum imitantes, easdem litteras et in eis contenta quaecumque, ex certa nostra scientia, ac de nobis a Deo attributae potestatis plenitudine, tenore praesentium, approbamus, confirmamus atque etiam innovamus, easque et ea omnia inconcussae ac validissimae firmitatis robur perpetuis futuris temporibus obtinere, et a cunctis quos illa quomodolibet concernunt, inviolabiliter observari debere decernimus, praecipimus atque mandamus.

Nulli ergo omnino hominum liceat, etc. Si quis autem hoc attentare, etc.

Datum Romae apud S. Petrum, anno Incarnationis dominicae millesimo quingentesimo nonagesimo, xiv kalendas ianuarii, pontificatus nostri anno i.

Dat. die 19 decembr. 1590, pontif. an. i.

<sup>1</sup> Omittitur insertio huius Bullae, quia habes eam, tom. VII, pag. 560: *Admonet*.

Pii V consti-  
tutio hic est in-  
dicata.

Confirmatio  
de qua in ru-  
brica.

Cardinalis  
Montaltus hanc  
dimittit praefec-  
turam.

Exordium.